



Ulikuwa wapi nilipoiweka misingi ya nchi?... Au ni nani aliyeliweka jiwe lake la pembeni, Hapo nyota za asubuhi zilipoimba pamoja, Na wana wote wa Mungu walipopiga kelele kwa furaha?—**Ayubu 38:4-7.**

Wengi sana kati ya wale waliokuwa wakimuunga mkono Lusifa waliongozwa katika kuzingatia ushauri wa malaika watiifu na hivyo kutubia hali waliyokuwa nayo ya kutoridhika na kupokelewa tena katika kuaminiwa na Baba na Mwana Wake Mpendwa. Kisha mwasi mkuu akatangaza kwamba alikuwa akijua sheria ya Mungu, na ikiwa angejisalimisha kwa utiifu wa kitumwa, angeondolewa heshima yake. Asingeaminiwa tena katika utume wake uliotukuka. Aliwaambia kwamba yeye mwenyewe pamoja nao, sasa walikuwa wamekwenda mbali sana kiasi cha kutokuweza kurudi na alikuwa tayari kukabiliana na matokeo yake, kwani kamwe asingesujudu kitumwa kwa Mwana wa Mungu; kwamba Mungu asingesamehe, na sasa ilikuwa lazima wadai uhuru wao na kupata kwa nguvu, cheo na mamlaka ambayo hawakupewa kwa hiari.

Malaika watiifu waliharakisha kwenda kwa Mwana wa Mungu ili wamfahamishe kile kilichokuwa kikiendelea kati ya malaika. Walimkuta Baba akiwa katika kikao na Mwana Wake mpendwa, ili kuamua kwa namna ambayo kwayo, kwa manufaa bora zaidi ya malaika watiifu, mamlaka ambayo Shetani alijitwalia yawekwe chini daima. Kwa mara moja, Mungu Aliye mkuu angeweza kumtupilia mbali mdanganyifu mkuu kutoka mbinguni; lakini hili halikuwa kusudio Lake. Angempatia mwasi nafasi sawa kupimana nguvu pia uwezo na Mwana Wake Mwenyewe na malaika Wake watiifu. Katika pambano hili, kila malaika angechagua upande wake mwenyewe na kushuhudiwa kwa wote. Isingekuwa salama kumwacha yeyote aliyeunganika na Shetani katika uasi wake kuendelea kuwepo mbinguni. Walikuwa wamepata fundisho la uasi halisi dhidi ya sheria ya Mungu isiyobadilika, na hili haliwezi kuponywa...

Kisha kukawa na vita mbinguni. Mwana wa Mungu, Mwana wa Mfalme, na malaika Wake watiifu wakaingia katika pambano dhidi ya mwasi mkuu na wale walioungana naye. Mwana wa Mungu na wale malaika watiifu walishinda; na Shetani na wenye kumuunga mkono wakafukuzwa kutoka mbinguni. Jeshi lote la mbinguni likakiri na kumsujudia Mungu wa haki. Hakuna hata doa moja la uasi lililosalia mbinguni. Kukawa na amani kamilifu tena na upatanifu kama ilivyokuwa hapo kabla...

Baba alishauriana na Mwana Wake kuhusu kutimiza mpango wa kumfanya mwanadamu airithi nchi (The Story of Redemption, 16-19).

Uasi wa Shetani ulikuwa uwe fundisho kwa ulimwengu katika karne zote – ushuhuda endelevu unaohusu chanzo cha dhambi na matokeo yake ya kutisha. Utendaji wa utawala wa Shetani, madhara yake kwa wanaume na wanawake, ungeonesha kile ambacho ni lazima kiwe matokeo ya kuweka pembeni mamlaka ya Mungu. Ungeshuhudia kwamba kuwepo kwa serikali ya Mungu kumefungwa katika hali nzuri ya viumbe wote aliowaumba (Patriarchs and Prophets, 42, 43).